

23/06/2001

Ku Li nafi mohon jawatan Menteri Kewangan

AHLI Majlis Tertinggi (MT) Umno, Tengku Razaleigh Hamzah menafikan kemungkinan beliau akan memohon jawatan sebagai Menteri Kewangan dan menolak sebarang spekulasi yang mengaitkan dirinya sebagai pengganti Tun Daim Zainuddin.

"Saya tak pernah mohon pun...ini semua terserah kepada Perdana Menteri Datuk Seri Dr Mahathir Mohamad. Banyak lagi orang yang layak.

"Yang buat spekulasi itu, awak semua lah yang buat," katanya ketika ditanya pemberita mengenai spekulasi yang mengaitkan dirinya sebagai pengganti Daim yang meletak jawatan pada 1 Jun lalu.

Tengku Razeleigh adalah antara yang disebut-sebut bagi mengisi jawatan Menteri Kewangan, selain Menteri Perdagangan Dalam Negeri dan Hal Ehwal Pengguna, Tan Sri Muhyiddin Yassin; bekas gabenor Bank Negara, Tan Sri Ali Abul Hassan Sulaiman; Gabenor Bank Negara, Tan Sri Zeti Akhtar dan Datuk Dr Awang Adik Hussin.

Mengenai sama ada beliau akan menerima sekiranya dilantik, bekas Menteri Kewangan itu berkata:

"Tak ada... ramai lagi ahli Umno, ada kira-kira 2.9 juta ahli Umno dan 23 juta rakyat Malaysia. Saya tak fikir saya memenuhi tiga kriteria yang ditetapkan Dr Mahathir."

Dalam perkembangan lain, Tengku Razaleigh berkata, ucapan perbahasan tahun ini dilihat sebagai satu suara yang membayangkan hasrat ahli Umno dan orang ramai secara keseluruhannya.

Walaupun tahun ini tak banyak perwakilan yang mengkritik, katanya, ia tidak bermakna pemimpin parti tidak patut ditegur.

"Tetapi banyak lagi masalah lain yang sepatutnya kita tentang pihak lawan dan orang asing. Perkara inilah yang lebih penting kerana orang ramai ingin mendengarkan penjelasan.

"Persepsi yang wujud daripada kempen mereka (pembangkang dan pihak asing), seolah-olah kredibiliti kita tak ada langsung. Apa yang dilakukan Umno, dan kemewahan yang dimiliki hari ini, bukan datang bergolek.

"Ini adalah berkat usaha semua pihak, pemimpin dan rakyat yang sokong kerajaan. Segala-gala ini akan hilang kalau kita tak pelihara apa yang adibina selama ini dan orang Umno sendiri tak boleh lalai dan leka," katanya.

(END)